

佛說療痔病經

唐三藏法師義淨譯

如是我聞一時薄伽梵在王舍大城竹林園中與大苾芻衆五百人俱時有衆多苾芻身患痔病形體羸瘦痛苦縈纏於日夜中極受憂惱時具壽阿難陀見是事已詣世尊所頂禮雙足在一面立白佛言世尊今王舍城多有苾芻身患痔病形體羸瘦痛苦縈纏於日夜中極受憂惱世尊此諸病苦云何救療爾時佛告阿難陀汝可聽此療痔病經讀誦受持繫心勿忘亦於他人廣爲宣說此諸痔病悉得除殄所謂風痔熱痔瘰痔三合痔血痔腹中痔鼻內痔齒痔舌痔眼痔耳痔頂痔手足痔脊背痔糞門痔遍身支節所生諸痔如是痔瘻悉皆乾燥墮落消滅必瘥無疑皆應

誦持如是神呪即說呪曰

怛姪他 頽闍帝 頽藍謎 室利鞞 室

里室里 摩羯失質 三婆跋覩 莎訶

阿難陀於此北方有大雪山王中有大娑羅樹名曰難勝有三種華一者初生二者圓滿

三者乾枯猶如彼華乾燥落時我諸苾芻所患痔病亦復如是勿復血出亦勿膿流永除苦痛悉皆平復即令乾燥又復若常誦此經者得宿命住智能憶過去七生之事呪法成就莎訶又說呪曰

怛姪他 苦謎苦謎 捨苦謎 苦末泥 去

捨苦泥 莎訶

佛說是經已時具壽阿難陀及諸大衆皆大歡喜信受奉行
佛說療痔病經